

BERTSOLARITZA. Txikien mailako finalean Hodei Iruretagoiena izan zen bigarren, eta handieneran Miren Artetxe

Gaztelumendi anaiak nagusi Eskolarteko Txapelketan

Unai nagusitu zen txikien mailako finalean, eta, Beñat 15 urtetik gorakoek jokaturakoan

Juan Luis Zabala | **DONOSTIA**

Unai eta Beñat Gaztelumendi añorgar anaiak nagusitu ziren joan den igandean Mungiako pilotalekuan jokatu zen Euskal Herriko Eskolarteko Bertsolari Txapelketako finalean. Unai txikien mailan izan zen onena —14 urte bitartekoetan— eta Beñat handietan nagusitu zen —15 urtetik gorakoetan—.

Txikien mailan Hodei Iruretagoiena zarauztarra izan zen bigarrena. Unai Gaztelumendi eta Hodei Iruretagoienerekin batera, Maddalen Berastegik eta Mixel Mateok egin zuten aurrera, saioko lehen fasea gaindita. Bigarren fasera pasatu ziren lau bertsolari horietaz gain, beste sei bertsolari aritu ziren lehen fasean: Miren Amuriza,

Eñaut Uruburu, Maddalen Arzallus, Maindi Murua, Garazi Taberna eta Aitor Zubiria.

Handien mailan Miren Artetxe izan zen bigarrena. Gaztelumendi eta Artetxerekin batera, Oihana Bartra eta Iñaki Viñaspre sailkatu ziren bigarren fase-rako, lehen fasean Jon Rementeria, Ander Lizarralde, Eneritz Zabaleta, Jon Elizetxe eta Mikel Azpiroz gainditu eta gero.

Jende ugari bildu zuen finalak Mungian, eta giroa ere ona izan zen, bertsolari batzuen jarraitzaileek egoki berotua. Bertsolariek ere ez zuten hutsik egin, eta saio orekatuak eskaini zituzten. Iparraldeko, Nafarroako eta batez ere Arabako bertsolarien gorakada nabarmena utzi zuen agerian, besteak beste, igandeko finalak.



MARISOL RAMIREZ / ARGAZKI PRESS

ANAI TXAPELDUNAK. Unai eta Beñat Gaztelumendi, txapela buruan eta garaikurra eskuetan. Etxean bertsozaleak eta bertso eskolan ikasiak, maila handia erakutsi zuten bi anaiak Mungiako finalean.

UNAI GAZTELUMENDI | TXIKIEN MAILAKO TXAPELDUNA

«Ziria sartzeko moduko gaiak gustatzen zaizkit»

J.L.Z. | **DONOSTIA**

Aurten egingo ditu 14 urte Unai Gaztelumendik. Datorren urtean handien mailan lehiatu beharko du Eskolarteko Txapelketan, anaia Beñatekin batera.

■ **Espero al zenuen finala irabaztea?** Ez. Uste nuen Hodei Iruretagoienera irabaziko zuela. Lehenengo fasean nahiko gustura aritu nintzen, baina bigarren fasean, ofizioka egindako saioko bertso bat hankaz gora atera zitzaidan, eta ez nuen irabazteko esperantza handirik.

■ **Zer moduzko maila izan zuen, zure ustez, finalak?**

Oso ona. Aurreko urteetako saioak ikusi izan ditut, anaia aritzen zelako, eta maila baxuagoa egoten zen. Iparralde-tik indartsu datoz, Nafarroatik ere bai. Baina ezusterik handiena Arabakoek eman dute. Duela bi edo hiru urte arte ez bezala, oso maila ona erakutsi dute.

■ **Zer moduzkoak ziren gaiak?**

Eskolartekoak.

■ **Nolakoak dira eskolarteko gaiak?**

Ez dakit nola azaldu. Kontua da ez dutela gehiegi sakontzeko biderik ematen.

■ **Etiket datorkizue Beñati eta bioi bertsozaleetasuna.**

Aitak txikitatik nahi izan omen zuen gu bertsozaleak. Horretarako hasi zen bera bertso eskolan, ikasle, eta bi edo hiru urterekin Txirritaren bertso zaharrak eta horrelakoak erakusten hasi zitzaigun, afafosteetan eta.

■ **Bertso eskolan hasi zineten gero.**

Bai, orain Santo Tomas Lizeoan Iker Alustiza dugu bertsoetako irakasle Beñatek eta biok, eta Hernaniko eskolan normalean Estitxu eta Ixiar Eizagirre, eta tarteka Joxe Anjel Aranburu.

■ **Zer bertsolari dituzu gustuko?**

Niri Joxe Agirre ikaragarri gustatzen zait. Jexux Mari Irazu ere bai, Amets Arzallus eta oraingo gazte asko...

■ **Eta zer gai eta zer ariketatik moldatzen zara ondo?**

Niri batez ere ziria sartzeko moduko gaiekin aritzen naiz ondoen. Bakarka ere moldatzen naiz, baina ofiziotan hobeto.

■ **Bertsoetatik aparte ere ziri sartzalea al zara?**

Hala esaten dute.

BEÑAT GAZTELUMENDI | HANDIEN MAILAKO TXAPELDUNA

«Bertsolari izatera iristea gustatuko litzaidake»

J.L.Z. | **DONOSTIA**

Duela astebete egin zituen 15 urte Beñat Gaztelumendik. Lehen urtea izan du, beraz, Eskolarteko Txapelketako handien mailan. Ez da, ordea, kikildu.

■ **Zer moduzko saioa izan zen, zure ustez, finalekoa?**

Nik uste dut nahiko saio orekatua izan zela. Beste urteetako finalekin konparatuz gero, Araba eta Nafarroako bertsolariak asko hobetu direla ikusi zen, eta Iparraldekoak zer esanik ez.

■ **Eta zeuk egindako lana?**

Neure buruarekin oso gustura geratu nintzen.

■ **Irabaztea espero izateraino?**

Esperantza beti izaten da, baina hasi aurretik oso zaila ikusten nuen irabaztea, besteek esperientzia handiago dutelako horrelakoetan. Gero, saioan, ez nuen besteen lana ondo entzuterik izan, eta ez nekien zer aukera izan nezakeen.

■ **Zer moduzkoak izan ziren gaiak?**

Niri onak egokitu zitzaizkidan, baina gai zailak ere bazeuden, esateko gutxi zutenak.

■ **Etxean bertsotarako giroa duzue, aitak sortua. Unairekin bertsotan aritzen zara etxean?**

Hiru urte pasa ditugu etxean geure artean bertsotan lehen baino gutxiago eginenez, baina txapelketaren aitzakian berriro hasi gara, Unai ilusio handia zuelako eta entrenatu nahi zelako.

■ **Zer bertsolari dituzu gustuko?**

Amets Arzallus, Jexux Mari Irazu eta Jon Sarasua gustatzen zaizkit niri.

■ **Zergatik? Zer ikusten diezu?**

Arrazoi sakonak erabiltzen dituzte, bertsoak oso ondo jostez gain, hankaluzerik eta horrelakorik gabe.

■ **Zer eratako ariketak dituzu gustuko?**

Bakarkakoak.

■ **Unai, aldiz, ofiziotan moldatzen da ondoen...**

Ziria dauka eta. Ni serioagoa naiz.

■ **Noraino iritsi nahiko zenuke bertsolaritzaren munduan?**

Niri bertsolari izatera iristea gustatuko litzaidake, eta horren barruan edozein gauza izan daiteke.